



Tuliofikiwa na Miisho

SABATO MCHANA

Somo la Juma Hili: Ufu. 6:12–17; Mt. 24:36–44; Mwa. 6:1–8; 2 Pet. 2:4–11; Mwa. 18:17–32; Dan. 7:9, 10.

Fungu la Kukariri: “Basi mambo hayo yaliwapata wao kwa jinsi ya mifano, yakaandikwa ili kutuonya sisi, tuliofikiliwa na miisho ya zamani. Kwa hiyo anayejidhania kuwa amesimama na aangelie asianguke” (1 Wakorintho 10:11, 12).

Biblia imejaa masimulizi ya watu wa Mungu yanayoelekeza katika matukio yajayo na ambayo yana funguo zinazotusaidia kuelewa “ukweli wa leo.” Kwa kweli, baadhi ya masimulizi hayo ni kivuli cha matukio ya siku za mwisho yenye maelezo ya kustaajabisha, yakitupatia msingi mpana zaidi wa kuelewa kwa wazi unabii wa Danieli na Ufunuo.

Bila kukiuka uhuru wa dhamiri wa mtu, Mungu anaweza kuelekeza kikamilifu matukio ambayo yatatokea katika siku za mwisho, yale ambayo aliwafunulia manabii. Baadhi ya masimulizi haya muhimu ni dhahiri, kwa sababu Agano Jipya linayarejelea hasa katika kuelezea matukio ya siku za mwisho: Sodom na Gomora, Gharika, n.k. Mengine yanahitaji tafakari na uchunguzi wa kina ili kupata kwayo ukweli tuliopewa katika Neno la Mungu.

Kwa majuma kadhaa yajazo, tutakuwa tukichunguza masimulizi kadha wa kadha muhimu ili kuona kile yanachoweza kusema kuhusu matukio kama vile Ujio wa Pili wa Yesu, hukumu ya upelelezi, pambano la mwisho na zaidi. Na katika hayo yote, Kristo ndiye kiini, kwa maana ni lazima awe msingi na vilevile lengo la mwisho la juhudi zetu zote za kiunabii.

**Jifunze somo la juma hili kwa maandalizi ya Sabato ya Juni, 7.*

Hasira ya Mwana-kondoo

Soma Ufunuo 6:12–17. Zingatia maelezo ya mwitikio wa watu hawa kwa kuona matukio ya siku za mwisho yakitokea ghafla. Unaona nini kuhusu mwitikio wao?

Inafurahisha kutambua kwamba waliopotea hawalii kwa sauti, “Ni jambo gani hili?” au “Ni nani aliye nyuma ya hili?” Wanaonekana kujua kinachoendelea. Wanamrejelea Yesu kama “Mwana-Kondoo,” ambalo lingehitaji kujua jambo fulani kuhusu kisa cha Kristo. Pia wanaonekana kufahamu kwamba “siku iliyo kuu ya hasira Yake imekuja,” na kwamba wako katika hali isiyo na tumaini: “Ni nani awezaye kusimama?”

Kabla ya mwisho, injili inapelekwa kwa kila taifa duniani (*Mt. 24:14*) na ujumbe wa malaika watatu unatolewa kwa sayari yote. Hata hivyo, kutakuwa na watu watakaokutwa hawapo tayari—si kwa kukosa habari bali kwa sababu ya kukataa kwao kuamini na kutii. Hii itakuwa sababu ya watu kama hao kupotea katika siku za mwisho.

Soma Mathayo 24:36–44. Ni masomo gani ambayo Yesu anatuambia tunapaswa kuyapata kutoka katika kisa cha Nuhu?

Yesu anaelekeza katika kisa cha Gharika ili kutuonya kwamba ujio Wake wa mara ya pili utawashtukiza wengi. Kama vile Ujio wa Pili wa Kristo, Gharika haikuushtukiza ulimwengu kwa sababu ya kutokuwa na habari. Nuhu alihubiri kwa miaka 120 kwa ulimwengu ambao ulikataa kuamini. Waliambiwa kitakachotokea. Hawakuamini tu.

Wakati huo huo, watu wengi hujiaminisha kwamba kupita kwa muda mrefu kunamaanisha kwamba unabii ni wa uongo. Akitumia kisa cha Gharika kama muktadha, Petro anaandika “watakuja na dhihaka zao watu wenye kudhihaki, wafuatao tamaa zao wenyewe, na kusema, Iko wapi ahadi ile ya kuja kwake? Kwa maana, tangu hapo babu zetu walipolala, vitu vyote vinakaa hali iyo hiyo, tangu mwanzo wa kuumbwa” (*2 Pet. 3:3, 4*). Kila mwaka unapopita, hisia hii itazidi tu kuongezeka.

Katika uzoefu wa kila mtu, Ujio wa Pili wa Yesu (au wakati mwingine, Kuja Mara ya Tatu) si zaidi ya muda mfupi tu baada ya kifo na sote tunajua jinsi maisha yanavyopita haraka. Mtazamo huu unaweza kutusaidiaje kushughulika na “kucheleweshwa”?

Uinjilisti wa Nuhu

Petro anatumkumbusha kwamba wengi watakuwa hawajajiandaa kwa ajili ya kurudi kwa Kristo kwa sababu “hufumba macho yao wasione” (2 Pet. 3:5) kile kilichotokea katika Gharika. Leo, ingawa ulimwengu unayo kumbukumbu ya pamoja ya gharika kubwa (idadi ya kushangaza ya tamaduni za ulimwengu husimulia kisa cha gharika yenye kuharibu, kuanzia kwa Wayunani wa kale hadi kwa Wamaya), kisa cha Nuhu leo labda ni moja ya masimulizi ya Biblia yanayofanyiwa dhahaka sana. Kama ilivyotabiriwa, ulimwengu kwa makusudi unaweka kando kisa hiki kama hadithi ya kubuni/uongo, bila kujali jinsi inavyoelezewa kwa wazi sana katika Agano la Kale na inarejelewa mara nyingi katika Agano Jipya.

Yesu alisema kwamba hali ya ulimwengu ingefanana na “siku za Nuhu” katika Mathayo 24:37-39. Linganisha kifungu hiki na Mwanzo 6:1-8. Hali za kimaadili zilizopelekea Gharika zilikuwa zipi? Kuna ufanani gani kati ya nyakati hizi mbili?

Kuna somo lingine muhimu kwa watu wa Mungu waliosalia wa siku za mwisho linalotokana na kujifunza kwa makini. *Waebrania 11:7* inatuambia kwamba Nuhu “aliunda safina, apate kuokoa nyumba yake. Na hivyo akauhukumu makosa ulimwengu, akawa mrithi wa haki ipatikanayo kwa imani.”

Hebu fikiria unahubiri kwa zaidi ya karne moja, bila mafanikio ila familia yako mwenyewe ndani ya safina. Ikiwa Nuhu angekuwa mwinjilisti wa zama hizi, tungeweza kumfuta kama mtu aliyeshindwa: miongo mingi ya kuhubiri na kile ambacho kingeonekana kama kutokuwa na matokeo. Jambo jema ni kwamba, kwa sasa, sehemu nyingi za dunia zinaitikia sana ujumbe wa malaika watatu. Kuwafikia watu kiunjilisti—kuhubiri ujumbe wetu wa pekee wa masalio—unaonekana kuwa wenye ufanisi kwa kushangaza katika maeneo mengi na wengi wanatokea kumjua Bwana. Bado hatujafika mahali ambapo hakuna matokeo, ingawa tumeambiwa wakati unakuja ambapo “kazi ya upelelezi itafikia kikomo, na mlango wa rehema utafungwa. Hivyo katika sentensi moja fupi, ‘Nao waliokuwa tayari wakaingia pamoja naye arusini; mlango ukafungwa,’ tunachukuliwa na kupitishwa katika huduma ya mwisho ya Mwokozi, hadi wakati ambapo kazi kubwa ya wokovu wa mwanadamu itakapokamilika.”—Ellen G. White, *Pamabano Kuu*, uk. 355.

Hadi wakati huo, tunayo kazi ya kufanya kama kanisa.

Tunawezaje kujifunza kutovunjika moyo ikiwa kazi zetu za uinjilisti binafsi hazionekani kuzaa matunda mengi kwa sasa? Kwa nini ni lazima tuendeleze juhudi zetu? (Tazama Yohana 4:37.)

Kisa cha Sodoma na Gomora

Kuna simulizi lingine muhimu la Agano la Kale ambalo Petro analirejelea moja kwa moja anapoelezea matukio ya siku za mwisho: kuangamizwa kwa Sodoma na Gomora. Miji hii ya tambarare imekuwa hadithi ya kale kwa uovu wao na kuwa mfano wa kwanza wa maeneo yanayokaliwa na idadi kubwa ya watu yaliyoharibiwa kwa moto kutoka mbinguni.

Soma 2 Petro 2:4–11, Yuda 5–8, na Ezekieli 16:46–50—na uzingatie maelezo yote. Ni hali zipi za kimaadili zilizosababisha kuangamizwa wa miji hiyo na kuna ufanani gani leo, vilevile?

Onyo linalotolewa kwa watu wa siku za mwisho wa sayari hii kupitia simulizi la Sodoma na Gomora liko wazi: hatimaye, waovu pia wataangamizwa kwa moto, kama inavyoelezewa waziwazi katika Ufunuo 20. Dhambi ina udanganyifu wa ajabu kwa kuwa inatupofusha tusione hali ya mioyo yetu wenyewe, ikificha makosa yetu chini ya kujikubali wenyewe, wakati uovu unaotendwa na wengine mara nyingi unaonekana dhahiri kwetu. Katika sura ile ile ambapo Mungu alizungumza kuhusu kiasi cha upendo aliomwaga juu ya taifa Lake, anapaswa pia kulionya taifa hilo kwamba, ingawa halikufanya dhambi zilezile (*Eze. 16:41*), kwa hakika limekuwa ovu zaidi kuliko Sodoma.

Israeli walikuwa wakifanya “mambo ya kikahaba” (*Eze. 16:41*), wakifanya uzinzi wa kiroho. Hebu fikiria mshangao wa watu wa Mungu waliposikia kwamba wao ni waovu zaidi kuliko watu waliokuwa maarufu sana kutokana na uovu wao.

Hili si jambo geni, si kwa Israeli ya kale tu bali kwa wanadamu wote. Katika *Warumi 1:18–32*, Paulo anawasilisha orodha ndefu ya maovu ya wanadamu ambayo ingeweza kuandikwa katika magazeti ya leo. Maelezo ya Paulo juu ya dhambi ya Wamataifa hayakukusudiwa kuleta hisia za kuwa bora zaidi kati ya Wayahudi bali ili kwamba watu wa Mungu hatimaye waweze kuelewa uzito wa dhambi zao wenyewe. Nathani alifanya vivyo hivyo alipozungumza na Daudi: alisimulia kisa cha tajiri aliyeiba mwana-kondoo kutoka kwa maskini. Kisa hiki kilifanya “hasira ya Daudi ikawaka sana” (*2 Sam. 12:5*), kwa sababu udhalimu ulionekana dhahiri; hata hivyo, ilihitaji tamko la Nathani, “wewe ndiwe mtu huyo!” (*2 Sam. 12:7*) ili kumfanya Daudi ajione mwenyewe katika simulizi hilo.

Ni muhimu kukumbuka kwamba Biblia haikuelekezwa hasa kwa ulimwengu wa nje bali kwa watu wa Mungu mwenyewe. Tunapona dhambi mbaya sana za wengine zikielezwa katika kifungu kama Ufunuo 13 au 17, ni onyo kwamba sisi pia, tunaweza kuangukia mtego huohuo.

Mhukumu wa Ulimwengu Wote

Kabla tu ya kuangamizwa kwa Sodoma, kuna kisa cha kidadisi kinachotokea katika tambarare za Mamre. Mungu anamtokea Ibrahimu, akiongozana na malaika wawili. Ibrahimu anapowaona, anawaalika wageni wa mbinguni kupata chakula, na ni wakati huo ambapo Mungu anaahidi kwamba Ibrahimu na Sara watapata mwana ambaye kupitia kwake angezaliwa Masihi. Yesu, kwa hakika, alitoka katika ukoo wa Ibrahimu (*linganisha na Gal. 3:16*). Kisha kwa ghafla kisa kinageukia suala la miji miovu ya tambarare.

Soma Mwanzo 18:17–32. Tunajifunza nini kuhusu tabia ya Mungu na jinsi ambavyo hatimaye anapanga kukabiliana na uovu katika sayari yetu kutoka katika aya hizi?

Hatumdai Mungu maelezo, lakini anachagua kutoweka wazi nia na mipango Yake kwa wanadamu. “Hakika Bwana MUNGU hafanyi neno lo lote,” nabii Amosi anatuambia, “bila kuwafunulia watumishi wake manabii siri yake” (*Amo. 3:7*).

Kabla ya Mungu kuangamiza Sodoma na Gomora, Anatangaza kwamba jambo pekee sahihi ni kumjulisha Ibrahimu kuhusu kile kitakachotokea, kuhusu kile ambacho anaweza kutazamia kushuhudia hivi punde.

Mungu anabaki na Ibrahimu huku malaika wawili wakienda katika mji huo mwovu ili kuwaita wale watakaotii onyo lao. Mtu hawezi kujizuia kuwaza juu ya malaika wa kiunabii wanaofanya kazi hiyo hiyo katika siku za mwisho, wakiwaita wale watu wa Mungu waishio Babeli watoke humo (*Ufu. 14:6–12, Ufu. 18:1–4*). Onyo la mwisho linapotolewa, Mungu anajadiliana na Ibrahimu juu ya kile kinachokaribia kutokea na kwa hiari anakubali kujibu maswali ya mzee huyo.

“Hasha usifanye hivyo, ukamwue mwenye haki pamoja na mwovu,” Ibrahimu anauliza, “ ‘Hasha Mhukumu ulimwengu wote asitende haki?’ ” (*Mwa. 18:25*). Ibrahimu hachunguzi tu kisa cha Sodoma, lakini pia anachunguza tabia ya Mungu. Vivyo hivyo, kabla ya mwisho kuja, Mungu anafungua vitabu vya mbinguni (*Ufu. 20:4, 11–15*) na kuturuhusu kuchunguza ushahidi kabla hatimaye hajaleta moto duniani. Yaani, tutakuwa na miaka elfu moja ya kupata majibu ya maswali mengi ambayo kwa sasa hayana majibu.

Kabla ya Bwana kuleta hukumu ya mwisho juu ya waliopotea, anatupa miaka elfu kuelewa kile kitakachotokea kwa nani na kwa nini. Hili linatuambia nini kuhusu tabia Yake na jinsi alivyo wazi kuchunguzwa na viumbe vilivyumbwa—viumbe vinavyomtegemea Yeye kabisa ili kuishi—na ambao hawana haki ya asili ya kujua mambo haya?

Hukumu ya Upelelezi

Maelezo juu ya hukumu yanayopatikana katika Danieli 7 yanatuwezesha kuona nyuma ya pazia—fursa ya kustaajabisha ya kuona jinsi Mungu anavyotatua tatizo la dhambi wakati bado akiwakomboa wale wanaotaka kuishi katika uhusiano wa agano Naye.

Soma maelezo juu ya hukumu ya upelelezi yaliyotolewa katika Danieli 7:9, 10, 13, 14, 22, 26 na 27. Lengo kuu katika hukumu ni lipi? Ni hukumu gani ya uamuzi iliyotolewa mwishoni mwa mchakato? Hili linatuambia nini kuhusu mpango wa wokovu?

Kuna swali dogo kwamba jamii ya wanadamu inahukumiwa na Mungu. Mhubiri 12:14 inatuhakikishia kwamba “Mungu ataleta hukumuni kila kazi,” na Paulo anatumkumbusha kwamba hatuhitaji kuhukumiana sisi kwa sisi, kwa sababu “sisi sote tutasimama mbele ya kiti cha hukumu cha Mungu” (*Rum. 14:10*). Bila shaka, Mungu hahitaji kumbukumbu ili kujua ni nani anaokolewa au kupotea, lakini malaika—ambao wamekuwa wakichunguza mpango wa wokovu kwa muda wote (*1 Pet. 1:12*)—kwa kawaida wangekuwa na maswali. Walikuwa mashahidi wa uasi wa Shetani na waliona theluthi moja ya malaika wa mbinguni wakifukuzwa kutoka mbinguni (*Ufu. 12:4*)—na sasa Mungu anataleta mbele Zake. Mungu anafungua vitabu na kuruhusu watakatifu kuona kila kitu.

Kisa cha Ibrahimu kusihi kwa ajili ya Sodoma na Gomora—mfano wa hukumu—kinatupa umaizi fulani muhimu kuhusu hukumu. Dhambi za Sodoma kwa wazi zilikuwa zinachunguzwa; Mungu anataja kwamba uovu wa mji huo ulikuwa umeupa sifa iliyosababisha kilio dhidi yake kikawa kikubwa (*Mwa. 18:20*). Lakini haikuwa Sodoma na Gomora pekee ambayo ilichunguzwa kabla ya kuangamizwa kwake. Mungu pia alifungua mlango kwa Ibrahimu kuchunguza ikiwa Mungu alikuwa anatenda haki katika uamuzi Wake wa kuwaangamiza waovu.

Wakati huo huo, ambaye anatokea katikati ya hukumu ya mbinguni, katika Danieli 7, bali “Mwana wa Adamu,” Yesu (*Dan. 7:13, tazama pia Mt. 20:28*), ambaye kujitokeza Kwake ndiyo sababu pekee inayofanya ‘watakatifu wake Aliye Juu wakapewa hukumu’ (*Dan. 7:22*). Haki Yake kamilifu pekee huwawezesha watu Wake kufaulu hukumuni.

Hebu fikiria umesimama katika hukumu huku siri zako zote zikifunuliwa mbele za Mungu wetu mtakatifu. Ni nini tumaini lako pekee wakati huo wa hukumu? (Tazama Ijumaa).